



Editorial

CHAMNA DIK TAK

Psalms 4: 8; Colossians 3: 15

Catherine Marshall in, “Picture of Peace” ti thusim ajikna ah bang ti gual hi chamna diktak limsuak ahi ala hilchian hi. Aman thusim khat agen a, Lengpa khat in limjik thiam te kiangin “Chamna Diktak” limsuak jik-unla ajik thiampen kianga kipakman kapiak ding ahi ti’n a gen a.

Limjik thiam tamtakte chun bang tiguual chu chamna diktak limsuak hiding ahem! ti’n amau geldan chiat ajik tau ahi. Tichun, a jik zaw chiat phat un, a ban in ahung enchiat ah, a zawna lam in lim zik pani cho a um ta. Lengpa chun a en ah, lim masa chu, “Dil (lake) khat chu tuichimset dapjinjen ziang, akimvel’a pakcha pak leh mualsang thim khat in akualkhum a, mual chung a chu van dum jinjen leh sôm kangsitset kijak aum a” zia chu chamna diktak limsuak di’n akilawm khawp mai ahi.

Lim kizik apanina chu “Dil khat mâ ahin mual in akualkhum

a, ahinla mual chu azolsisel pua, suang leh thing kihel in mual chung a chun sumpi akikhanga, van nimin, kol aphe’n, têt akhia, gua le azu, chuleh mual’a suang-pite a pat chun tui ahung luangtha zengzung mai a” chamna diktak lim apua zo lo ahi. Hinla Lengpa chun hawitak in a et nai leh tui hung luangthakna nuai a chun suangpi kala thingphung neu khat akek ah, achunga chun vacha khat in bu asia ahi. Zia guala van nim-gua zu nuai ah leh tui luang zengzung ziang lak a vacha khat lungmuang tak ah abu sunga um chu amu phat in Lengpa chun zia lim a panina zawk chu a teldawk zaw ta ahi.

Lengpa'n Bang zia ah atel ahem? ti ahilchetna a chun, "chamna diktak kiti hi munthip, gal leh tual umlona chuleh buaina bangma umlo zia ah ipua, chamna diktak kiti chu mun haksagal leh tual lak hihenla, buaina dimset ziang leh le nuam tak leh lungmuanga hintheina chu ahi zawi" ti'n agen hi. Chamna diktak hi Chamna Lal Chapa nei a kipat bep ahi. Amun leh aphot puak ah ipua'n isungua chamna achen zia a lungmuang leh kicham taka hing thei zawk ihu. Zia ti gual neite chun chamna diktak chu anei thei uh ahi.

Paul'in, "Christa apat hung pawt chamna'n la-lung sungua vaihawm hen, zia dinga chu taksa pumkhat la hui" atia. "Zia ti gual Christa a chamna nei zosia chu kipak taka hinkhua amat di'u ahi" ti'n Labu ziktu'n ei hil hi. "Lungmuang taka kalupa, ka-imut ding ahi, bit takah ei chensak thei nangbep la hi Lalpa" ati. Bangtigual buaina lak a um ziang leu hinle, Lalpa Jesu ah chamna diktak inei ua leh lungmuanga hinkhua mang ding ihu.

--o0o--

MIGIN UM EBEDMELEK!!!

-Rev. D. Robert Thanga

Thumapui: Jeremiah bu sung a bung 38 leh 39 ah hin midang lam tak mai Pathian in Zawlnei Jeremiah mang ah, khawpi (Jerusalem) siatna thu genna ding in mipakhat Ebedmelek kiti pa chanchin dang lam tak mai hi mu thei ahi. A tawi dan leh ana sep dan apat hin, ama hi Pathian lungtuak tak mi ahi ti hetthei ahi. “Jeremiah 39: 16-17, Israelte Pathian, Sepai hawnte LALPA chun zia gual hin a gen hi vati'n ; zia khawpi chung ah thilpha hilo, a sia bawl ding ti ah ka gensa zosia hi, buting ngei ngei ding ahi, zia guitunna chu nangma mit ngei in mu ding la hi. Himaleh, ziaphat chuleh, hun hukdaw ing ka tin, la tizat ma ma te khut in hun pelut lo ding ka hi, LALPA'n a ti”. A nasep lopi tak ziak in LALPA lung a tuak a, ama hinkhua mangthai na ding din mun in le hukdaw in um hi. Zia ama hinkhua apat hin, zil daw ding tam tak aum ban in tuhun a hinle khristiante a ding ah hin

Ebedmelek Chanchin:

Zia mi tilge pa min hi Ebedmelek ahi, amin um zia ahi le, “Lal Sialaw” ti'na ahi. Ama hi Ethiopia mi, mi vawm ahi. Ethiopia hi Aigupta Nile lui gei ah gam ahi, Ethiopia hi ‘Nubians’ ti'n le agen bawk ui. Ebedmelek hun sung a hin Judah lalte chu Josiah, Jehaohaz, Jehoiakim, Jehoiakin leh a nunung pen, Zedekiah a hiu. Jeremiah ahi le Zedekiah vai hawm hun lai a mi ahi. Jeremiah in Babulon lengpa khut a Jerusalem piakdaw hiding dan

a tang kopi ziak in, Lengpa Zedekiah in matsak ding in thu a piaci. Tichun Lengpa sepai te chun zawlnei Jeremiah chu kul sung ah kum lo in, tuikul ah a khelut ui ti ebedmelek in aheth phat in aman le Lengpa kiang in avatut ah. Tichun Lengpa chun aheth phat phat in, ebedmelek kiang in mipathum kipui inla, zawlnei Jeremiah chu tuikul kipat va ladawking in thu a pitai.

Ebedmelek hinkhua apat zildaw ding ah pawimaw te:

1. Jeremiah 39:9 “He pu leng-

- pa, zia mite hin Zawlnei Jeremiah tuikul sung ah kial ah thi ding ah a khiak lut uh hi a dik puai". Ebedmelek hin Lengpa vai hawm sung a thil dik lo a vaihawn na um chu, ama hina Lal sialaw mai himaleh, hangsan tak mai in, gen in, a din pi ngam hi. Nasepte 4:13 I mu gualin, "Peter leh Johan hansen dan chu a muu in, lamdang a sa ma mau a" Pathian Thagau Thiangtho ah dim ziak un, vaihawmte ma ah le thil dik tak chu a puang zak ngam uh ahi.
2. A ma dinmun tiang a siat thei na tung thei ziang ta lele, mite panpi na ding din mun ah aum chun a panpi ziang hi. Philippi 2:4 "Kuama'n ama a ding bep enlo in, midang a dingle en zaw hen". Tulai khawvel ahinle thil paw maw tak khat ahi. Midang taw le chengkhawm ihi ziak un, mani adi cho gel ziang lo a, midang te haksak, beidawn na te hiat thiampi kawm a khawsak a ngai hi. Zia chu Khristian hin dan pha, hiat ding a paw maw tak ahi. "Zia lungthim Jesu Khrista ah um kha, nangmau ah le um ta hen"(Php 2:5).
3. Midang damna ding a kal suan in, a thumai hi loin, Jeremiah 38:12 a chun, "Ethiopia mi, Ebedmelek chun Jeremiah ah kiang in, zia puansia leh a eksate hi la zak ah khit in". Tichun Zawlnei Jeremiah, tuikul sung ah kipat, khaidaw na ding in puansia mangcha in a hukdok ahi. Zia gual ma chun, kochuam sung leh khawtang in, a bik tak mai in khanglai te taksa leh thagau dam lo hukdaw ngai tam tak aum hi. Ebedmelek in Jawlnei lopi tak mai Jeremiah tuikul, buanthuak, namse tak mun ah pat hukdaw na, puansia leh a eksate amat gual in nang leh kei le, Pathian in ei mang ut ahi. Ahin la Pathian in ei mat thei na ding a chun, ebedmelek gual a kipiak zaw na te, ginumnate, titakna te nei angai hi.

Thukhakna:

A chung ah i tak lat tak gual un, Zawlnei Jeremiah hun lai gual in tuhun in le, Pathianin mi dik, Thagau thiantho ah dim, hangsan leh mi titak a doi ahi. Ebedmelek Lal sialaw ziang in bawn, hangsan tak mai in, thudik a dinpi ziak in, Jeremiah tuikul sung ah thimai ding din mun

a aum lai in hukdaw na achang kit hi. Zia ban achun a nasep hangsan ziak in, Pathian lungtuak in, ama ngei le Jerusalem suk siat ah um lai a, mitam takin thi na a tuak lai un, Pathian hukdaw na achan khawlaw hi. Zia gual achun, tulai khawvel ahinle Kochuamte leh ei ma mimal tin in, hukdaw ngai, panpi ngai, taksa leh Thagau lam a beidawng ngawi ngawi tam tak mai aum

ui. Ebedmelek chun Jeremiah kiang in, zia puansia leh a eksate hi la zak nuai ah khit in, ati. Zia gual chun, Jeremiah inle a bawl ngal a, tichun, khauhual ah chun Jeremiah chu tuikul sung ah kipat chun a khaidawk tau ahi.

--o0o--

INKUAN AH LALPA NASEP

Joshua 24:15.

By: Rev. Seilunlal Vaiphei

Tuhun ah Christian inkuan tam takte a siamtu Pathian hephalo ah insung siam tup na lam sang ah inchen ding buai pi tam tak a um tai. Tuni Inkuan ah Lalpa nasep ti thupi mangcha holimna thei kham kham ah nei ding ihu a. Hiatna leh pilna lam ahin naupang cha ka hi ziakin gen ding ah lawm leh zik ding ah lawm tam tak ziklo le um thei ahi ziakin amasan la ngaidam nau kahung dawn hi. Chun, Khristian sungkuan ah Pathian nasep na hin thil pawimaw ah kahiat te anuai

Inkuan/sungkuan Umzia:

Sociologiste chun sungkuan hi vantang hinkhawmna, a sialam leh a phalam ah siamtu hi in a hiau a, a pun ah hinkhawm bulpatna pawimaw pen in a a ngai ui. **Ira Reiss** chun, *“Sungkuan chu kilaigui zawpna neite chenkawmna mun, mi pit-ing hi ding ah kisiamdawnna mun chu ahi”* a ti. **Adrian Wilson** chun, *“inkuan/sungkuan chu thisan ah kizawp ziak ahem, dan in a phut ziak ahem ah dawidan kibangte chenkawmna mun, nek leh dawn hawlna leh naupang etkawlna lam ah pangkhawmtute chu ahiu”* a tii. **Peter Murdock** chun, *“inkuan/sungkuan chu in khat ah kilawi, kibatna nei, nupan leh a chateu lungual tak ah a um khawmna*

chu ahi” a ti kit hi.

Inkuan/Sungkuan ah Pathian nasepna a hin thil pawimaw tam takte lakin bawl ding a pha ah ka hiatte anuai ahin ala enkhawm hitiu.

Bible sim:

Inkuan ah Lalpa nasep khawmna ding ahin, amasa pen in Pathian thu sungkuan ah simkhawm hi thil pawimaw tak khat chu ahi. Khawvel khanto gual zel in mihing hiatna le akhangto zel a. Mihing hiatna leh ngaituana adanglam zel ziakin inkuan/sungkuan khat chu eima pilna lam sang ah Pathian dawidan ah i ki kaihuai zel zawk thei na ding leh ana hat taka i sep thei zawk na ding in Bible sim tam na lam ah pan ihalak uh pawimaw ahi.

Pauchap khawm:

Zia hin Pathian nasep na ah inkuante'n hun si'n ah hat tak leh gin um tak i sep zel the na ding in inkuan pauchap khawm zing a pawimawi. Pauchap na hin thil ahi thei ah asupiting thei hi. Gingtute a ding ah pauchap hi galvan manchak pawimaw tak ahi. Ziaziakchun, Pauchapna hat taka kalsuang inkuan i hi ding ahi.

Pathian Chawihawi khawm:

Pathian chawihawi na hi Biakin leh lengkhawmna lam in iha bawl uau, inlam ahin chu i ha bawl lo uh ahi. Sungkuan lasak ah Pathian pak khawm thei hi man tamtak ahi ziakin nisin in ibawl leh izui ding chu ahi. La phuak thu'n *"insung nuam chu van gam nai pen ahi"* ati gual in sungkuan ah Pathian chawihawi tam hi inkuan ah Pathian nasep khat chu ahi.

Pathian thu ki kaihuai:

Inkuan ah Pathian nasep zia pawimaw dang khat chu Pathian thu a kizilsak leh kikaihuai hi ahi. Biakin leh Sunday School mai in zil sen ding gual ahilo ziakin, nisi'n zan si'n ah i umna sungkuan apat ah zil ding ahi. Nu leh pa leh u le naute lak a um dante

lawite leh invengte tawh khaw-sak khawm dante khawtang leh gam leh nam i mawpuaknate hi bang tik lai in le Pathian thu tawh a chiakhawm theina'n kizil sak sek a ngai hi. Johan chun *"ka chate thutak ah a um zing ui ti ka het khel ah kipakna lianzaw ka nei puai"* (3 John 4) a tia.

Sungkuan kaihuai ah, enkawl sektu Pathian hemil ah, thildang ngaipawimaw hi abailam khawp mai sek hi. Sum leh pai, in leh lo, dinmun pha hi alopi pen ah ngai thei ahi na chang a um sek hi. Sungkuan chia dan thununtu ah le mat a bailam ma ma sek ziakin pilvan apawimaw hi.

Biakin kai khawm:

Christian inkuan khat chu taksa leh thagau ah khenchuam umlo a chengkhawmte chu ahlu. Taksa lam lunggul takluat ziaka Biak in kikhawpna ngaisak man talo inkuan lahi chun lungkimna mu diaklo ding lahi. Nu leh pa te hi lei ah Pathian ti ahi ziakin inkuan suktupna hin mawpuakna liantak nei ahlu. Cha leh naute Pathian Biakin chiana ding lampi kawkm tu ding leh puihuai ding chu inkuan ah Pathian nasepna a dinga Na pi pen khat chu ahi.

Thilpiak:

Thil piak ahin Meithainu thawlawm piak chungchang ah khan Lal Jesu'n piak tam leh tawm sang in alunggil zosia ti tak zet ah apiak chu a pakchat ahi. Zia gual ma chun Khristian Inkuan khat chun piak nawpna lungthim anei ngai ahi. I piak ding ah um tawm leh tam thu hilo in dik taka i piak chun Pathian kipakna ahi. Chun, i thilpiak bang i nei nak-lai teu apat Pathian a ding ah i kiphall kitna chun sepdaw len tak anei hi. Mihing kipakna mai hilo ding in Pathian kipakna chang zaw ding a piak ding ahi. Et-saknan, Missionary box, genthei lengvai, sawmdawl leh panpi ngaite.

Midangte tawh kicham dial ah um:

Sungkuan tampi cheng khawm ihi bak un kuama mimal ah khawsa thei ki umlo ahi. Khat leh khat ki mamawtua chiat ihi ziakun mi dangte ngaimaw thei ding haw bawlllo aphai. Ki mamaw hun ah kipanpitua leh dinmun siat lai ah kidawptua hi thil pawimaw pen khat ahi. Zi-aziakchun, midangte chung ah sungkuan in Pathian na isep thei na ding un kingaisaktua leh mi-

dangte a ding ah dawngkhawlu tu hilo ding leh panpitu pha chuam ihi zawk ding uh ahi.

Thukhakna:

Khristian inkuan hinkhua ahin Lalpa Na bep sep ding hi i thupipen khat chu ahi. Khawvel zosia chia ah chanchinpha va hil theilo ma leu hinle zia Na chu lampi chuam chuam ah sep thei ahi ti hiat chian aphai. Pathian nasep ahung kipatna ding chu insung tin apat ahi a ngai hi. I insungte'u khristian insung ti ah i kiko ngam tak tak phat uh leh, *"kei leh ka inkuante'n vang Lalpa Na bep sem ing kau"* kiti ngam bep in a.

Sungkuan tamtakte hin khristian sungkuan gual ah mel lat i ut ua himaleh atak ah mu daw thei ziang ding in taksap-na lian tak um abang hi. Khristian sungkuan siam daw na ding ahin daltu atam a, themtu le ahat diak a dia aw a tithei hi. Zia ziak achun mi dang apat hilo in zotu hina lungthim pu in hangsan tak ah i bawll phawt chun Lalpan zawnaw ei pian ti'n, Joshua gual in *"kei leh ka inkuante'n vang Lalpa Na bep sem ing kau"* ti thei ngei hi tiu.

NOAH LAWNG:

Matt 24:27-39, Gen 7:16, Exd 12:5-11. I Kor 5:7.

-Pausawndam, Kangvai

Amasan hunhawi leh hunpha ei petu Pa Pathian chu lopina chang ta hen.

Jesu'n Noah damlai gual a, thil ahung tun tak leh hung kit ding ahi dan (Matt 24:37-39, Luka 17:26) na ala gen gual in Noah Lawng leh ahun lai a thil um dan te in holimna nei hitiu.

Pathian in Noah kiang a lawng tuding in asawlna ziak:

Ahun lai a midik Noah te Inkuan leh Hinna nei ganhing dangte hinna hukhinna ding (Gen 6:19-20)

Bang gual gitlona ziak a, Pathian amihing siam a kisik hial ziang ahi diam? (Gen 6:6)

A gitlo danteu:

Ki pawng bawlna, hi-amngamna leh hindan diklo.(Gen 6:11-12) banggual ahem hindan dik?

Evi leh Adam kiang a, suan leh pak nei a, Khawvel lu-adim ding in thu apia,(Gen 1:28) maleh mihing leh mihing hitalo in, Pathian chapate (Vansawlchak nawthak a umte) leh mihing chanu te'n suan leh pak ahung hing tau ah, ziate chu, Nefilimte, Anak

suante (Gen 6:4, Numb 13:33,) ahung hing tau a, Baruk lekhabu bung 3na bung 4:10 (Ill Baruk 4:10) agen dan in tui let ahin, Nefilim chite hi 4,09,000 athiu tin agen ahi. Pathian lungnatna pat sukman thai ah a umlona ding a Pathian in Noah lawng atuk sak chu- adunglam tawng 300 zia chu ft 450 ahia, avai lam tawng 50, ft 75, asang lam tawng 30, ft 45 ahia, sawngthum nei a siam ahi. (Gen 6:15-16) Lalpa'n thu apiak gual ah alut ding sia alut kim/ lutzaw phat in Lalpa'n lawng kawt chu akhak tai. (Gen 7:16) zia chu Noah kum 600 atin kum thani na ni 17 ni apat in Gua nasa tak in azu pan tai. Sun 40 leh zan 40 tanlo in aju, tang sang pen te le tawng 15 tiang a thuk in chup ahi. (Gen 7:20)

Noah lawng apat zil ding:

Pathian lungnatna apat ah suk manthai a i umlona ding in, ama kipakna tâk in na isep a pawimaw'i. Khrista ah hinna nei-lote(mangthaite) hukdamtu ding a Lalpa'n Noah lawng gual ah adin hiatna sawng thum nei a, khawvel tuisuagiat chung a kitawl ihi. Pathian lungnatna pumpel a hukhin ahi theina ding un, ginna lawng a pulut ding hi nang leh kei maw puakna ahi. (Joh 10:10, marka 16:15).

I hinna kawt teu hawn-theilo ding ah akhak man(ithi-man) eima, i insung, ikhawtang atam thei pen hinna lawng lut ding in pan lai tiu. Zia chu id-amlai niu atawp a(Lalpan kawt akhak a) i thagau lam mit i hun tetni phat leh i lungdamna di pen ahi.(sam 17:15)

TITANIC LAWNG:

Titanic lawng hi asiamtu Thomas Andrew ahia, alawng siam dunglam hi ft 882.9, avail-am hi ft 92.6 ahi kit a, asan lam hi ft 104 in asang hi. Asiamtu hin muan um leh detdo thei di pen in asiam ahi. Asiam zaw a thudawtna anei hun un le "*ka-lawng hi muan um leh detdo di*

pen a siam ahia, Pathian in le mawk suksiat ziang thei puan na," tin alagen ahi. Zia lawng hi muan um tak ahi zia in ki hukhin na ding lawngneu (life boat) 1178 apua, mihing 2224 achuang a, lawng tawltu Edward Smith in England gam a Southampton apat in 39/40 km/ph speed a hat in date 10/04/1912, in New York khawpi zuan in akipan dawkt a ahi. Ni 3/4 vel aki tawl lai un hillawkna(Warning) muna le aki muan zia in limsaklo in aspeed uh chu le suniam lo in aki tawl zel ua, himaleh ni 4 tinni mel 375 zia chu km 600 atin in, tuipi nuai a vuk khal lian tak mai chu aphukha ta, alawng nuai lam kek in tui alut a, date 14/04/1912, 11:40pm in Atlantic tuipi thuktak Dum kelkul a chun alopina athahatna, amuan umna leh amin letna tawh atum duai duai mai ta ahi.

Titanic lawng apat eima ki etna ding in:

Gen 1:26-27 na imu gual un, mihing hi Pathian melpu hinna kibang, lopina, thuneina piak a um leh Pathiannin akhut ngei ah asiam hinna 'Hu' hinna hu ah ahinsa, taksa leh thagau ah de-

tdo tak ah asiamte ihu. I dinmun leh ihina te hi isia leh pha hiatna a ki enkawl leh ki veng a, kikem-
up ding a um ihu tihi ihiatmil lo ding uh ahi. I siat leh phat hiatna te hi mang thiamlo a, kituk tan-
na ding dan ihiatlo chun Khawvel tuisuagiat chung a, iki tawl lai ahin speed suknamna dingdawl helo a, ilim saklo ahi chun Titan-
ic lawng gual in ei le nikhat chu kumtuang thina tuipi lian ahin tum mang ngei ding ihu. Mihing mit in amu thei gitlona bep hilo in, imit in amutheilo sunggil lam sualna (gitlona) lak in le iki veng ding ahi.

Pawlam lat dan bep ah pha/hawi, Pathian lung tung zolo a um thei ahi. (II Timo 3:5)

Pawlam latdan bep muthei, mihingte leh lunggil lam entu Pathian et a tingthei ding in en hitiu.

I Samu 16:7. I Khang 28:9.

Esau leh Jakob te kihona Gen 33:14, na i muu gual in, Insungmi I zi icha leh nauthe leh igangualte sawmding in, idamlai niteu hi awl a kalsuan in mang hitiu.

Suaklu changkhat neknawp naziak ah, Sangal/Sawm tu 6/7 te thangkual a ki

khit in a awk lum sek ui. Ziagual chun ei ma le bangma lo gual a ingai, thil neu cha gual a kilang te hin, thina (Kumtuang thina) ei tut ding ahi.

(Thupil 14:12. 16:25)

Malai leng lopi leh minthang Babulon lengte, Israel lengte leh Lal Herod leh midang dangte le, bangma lo gual a kilang thilte ziak in amang thai uh ahi. Lalpa'n ei siam dan ei dindan alopi siat tawh ihi nau kihelo a, kimulo a mangthai ding melma Setan in imit ahi thim sek ahi. Ama hi nisin nek ding hawl in avak vel zing ahi.(I Peter 5:8. Jakob 4:7-8)

GINNA LAWNG:

Lal Jesu Khawvel ah alenlai a athugenlawk:

Nam leh nam, gam leh gam kidona, gam khat leh gam khat kidona, natna Hipite hung leng/hung tung ding, kialna taksa leh Thagau a kialna te, (Amos 8:11) Lin kiling ding thute, Dan khawksaklonate, kimuda tuana, kithatuanate, Jawlnei lem hung um ding thute kha tu hun ahin Khawvel mite ading in, lungdawnna, hatsamna, tuifawn nisin a ki nawk zing chu ahi tai.(Luka

21:25-26). Chule Setan in Pathian dona asiamsa mihingte chung ah athil bawldan te hi vak en thak hitiu.

1) Malai Eden huan ah Adam leh Evi te kha Setan Sawlchak Gederela'n Gul mang in a hinna thisan uh kumtuang thina gu ala hel piak in, ala susia, Pathian thupiak kha bawtsia'n, Pathian angung apat in nawdaw in ala um tau ahi.(I-Enok 69:6)

2) Naoh hunlai in Setan in hindan diklo, hiamngamna leh ki pawng bawlina te mang in (Gen 6:11-12) mihing chanute mang in suan leh pak tamtak ala nei pi a,

Pathian in Evi leh Adam kiang a suan leh pak tamtak nei ah, khawvel lua dim ding a thu apiak kha (Gen.1:28) palsian setan leh mihing apat in suan leh pak chate ahun nei tau ahi. Zia chun Pathian alungnat sak a, ami hing siam ziak in aki sik a hi kha(Gen.6:6) ziaziak a chun Pathian in, Khawvel ah hinna nei zosia sukman na din, tuisang letsak in asumang ta ahi. Zia hun a chun Setan sawlchakte leh mihing chanu te apat piang, Nefilim

suante kha 4,09,000 lam sukmanthai in a um ti ahi.(III-Baruk 4:10)

3) Tulai khang nunung ahin, Dragon/Setan in Khawvel vaihawmna Sawrkar thuneina, pilna thiamna sangtak mang in(Thupuan 3:1-10, 12:9) mihing thisan ki chuna/kidona hun itung tau ahi. Mihing hinna thisan a teptena khawvel gual pha hina mang in Setan in ei pui mang ding ahi tai.

Ziaziak a chun Pathian in ei ma ah akawi ithagau/ithisan hi Lalpa adin kemptup hitiu. (Job 32:8)

Ziaziak chun suapite haw, ziagual a khawvel tuifawn nisin a kinawk lak ahin iginna lawng teu hi van zion lam zuan in la tawling zing nam? Laphuaktu'n:

"I lawngteu agik taluai, tuifawn asang ngal a."

Ati gual in ilawng teu hi nisin ah isuk jangkhai zing uh chu apawimaw ahi.

Sawlchak Paul leh mi 276 te, Rome zuan a tuipi chung ah aki tawl lai un,(Nasep:27) Kret tuipi chung a thigawpi hat tak in anuai ta, alawng uh tuipi ah tum a man thailona ding un, alawng uh nivei asu jangkhai uh ahi. (Nasep

27:18-20) zia gual akhan ei man le i khawtang hinkhua leh itaksa ah bek zing taksa nawpna te, thunei nawpte pai than iginna lawng hi sujangkhai hitiu.

Tuipi chung ah thim khup a ni 14 an leh tui nelu dawnlo a sim leh mal le hethei lo kawp a um ngei in au, ziagual dimnun haksa a um lai ua chun, van thamuan-na aw gi "Paul lau kin"(Nasep 27:22-24) ti thucha hi ahung tung tai. Banggual bep a lopi in atha muan um ta diam!!!(Hallelujah) ei man le ziagual thamuan-na aw gi chu idawn apawi maw ahi. Khawvel tui sua giat lian chung a, ginna lawng ah izin lai ahin i bible Matt 8:23-27, Mk 4:35-41, Luka 8:21-25 nate ah imu gual un, Gerasin gam zuan a Dil chungu kuang ah aki tawl lai un thigawpi leh gawpi atuak ah, ziate apat aman thailo na ding un, kuang mawng lam ah imu Jesu akai thaw gual un, ei man le ilunggil mun kilkawi lam ah ika-wi (ilunggil lailung ilua sak seklo) Jesu hi kaitho le hin, amau gual in ei man le thamuan-na awgi dawng ding ihi.

Gen. 7:16 na imu gual in, Lalpa'n Naoh lawng kawt gual ah hawntheilo ding a i hin-

na kawt akhak man (Thup.3:8) Pathian Belam No thisan a tepte, thagau thiango in, nang leh kei hi, thil umdan te en in (Rome 13:11) kawng gaksa, kengtaw busa, tiangkhat khutsa van Zion zuan ah chia ziang thei ding ah kisazo sa um hun ahi tai.

Luka 21:28, na agen gual in tulai Khawvel thil tung zing te hin iki tatdawnu ding niu anai tai tina mai ahi.

Anu leh apa ten ei daw-isaklo, ikichending phallo/zak-dau nungak ihopi leh i lungsiat mama ikichen zawlo chuh i lawi-pha palai gin um mang in, ijam-pi in iki chenpi gual in, ei hepitu i Lalpa'n le palai ginum thagau thiango mang in, ahepite ei hun pui ding ahi tai.(Lk 14:23) ti hi hian, iginna lawngteu hi nisin in sujang khai hitiu, itup Van Zion itun thei na ding un.

Lalpa'n athu malzawl ta hen.

Amen.

--o0o--

Numei-te'n Pathian nâ a sepna'u

– Pro. Pastor Khaiminlun Vaiphei

Thumapôï:

Khawi tak gam hi lele kum 100 tuam vel masang a chun numeite chu innsungna asephawi u chun lungawi um leh huntawk in gel a la hi. Khawvel hung chia zel in tuhin vâng khawtang nasepna leh ki vaihawmna inle numei te phatchuam ngaina tampi a um ta. Thiam zilna lam in le numeite'n theitawp sua in khangthu a (History) numei te nasepna leh panlâk dan chuam chuam te chu phawl dawk in lekhabu in zik be zel zel ahi. Pathian nasepna lam inle numei te panlâkna leh aseppa uh pawimaw tak tak tampi muthei ahi kit bawk hi. Khangthu a 'Krista gingu kochuam' masâwn zel na ding in numei te'n "Pathian

1. Pathian nasep:

Pathianna sep ti hi Biak-inn sung ah thugen, lasak, thaw-lawm piak titiang bep huap lo in, khawi tak hi in bang tik hun hi lele, gingu kibelap zel na ding leh kochuam masawn zel na ding ah panlâk dan zosia hi Pathian na sem ti in huap lian ding in iki chial masa ahi. Missionary numei, missionary zi te, kochuam sung ah nute, innsung a nu ginum tak takte, khawtâng a nu, mi panpi ding ah ki phalte le Pathian lopî na ding ah sêm ahi chun Pathian na sêm ahi mai hi. Chun, pauchapna ala pang zing

te le Pathian na sêm in huap ahi.

2. Numei-te'n Pathian nâ a sepna'u:

Kum 20 vel chiata a pat in khangthu tawh kisai a mithiamte'n (historian) numeite Pathianna sepna chanchin hi nasa tak mai in ala khual pan uh ahi. Numei lekha thiam a punbe zel tawh ki tawn in khangthu lekha zik (history) ah numeite panlâkna khual daw leh hêtbe ding a tam ma ma mai hi. Lal Jesu khetdên ahi ma leh nung in numei tamtak chu chanchinpha puang zâk zel nading in ginum tak in ala pang u hi. Khang hung

chia zel in, tuni tiang in Numei tam tak kochuam, missionary, khawtang leh inn sung a ding in khuam det in a pang zel hi. Hunbi khen in Pathian nâ a sepnau a numeite pan ala lâkdan en zûi hitiu.

2.1. Apostolic hunlai:

'Apostolic hunlai' ti hi 'Lal Jesu khet dên ahi lai a pat ah sawlchakte a athi nunung pen chan hunbi kikal' tina ahi. Thuthung thak ah hin Jesu nungzui numei a um hi kichian tak in a lang hi. Jesu nu - Mari, Lal Jesu thawkîr nung a amu (witness) masapen - Mari Makdali, Bethany khua ah Jesu ala lamtua zing Mary leh Marthate unau leh a dang dang a um hi. Apostolic hunlai numeite-Pathian nasepna vak en hi tiu.

(i) *Nungzui numei tampi a um*

hi: A lim a pat in Juda numei nungzuite – Mari Makdalin, Joanna, Susannate hin amau thil neite (Private means) a kipat in Lal Jesu nasepna ala panpi uh hi (Luka 8:1-3). Mimal leh mipi lak in Lal Jesu'n numeite ala ki hopi zing a. Chun, Jentel numei khat in lal Jesu kiang in Pathian

nasepna hi nam/pawl/mimal khat a ding bep hilo in, kua hi lele ama ging zosia te a ding hilo ahem ti in ala gen ahi (Marka 7:24-30, Matt 15:21-28). Juda numei Mari in spikenard thau in Jesu keng asam in azût piak (Joahn 12:3) ti le mu ahi. Jesu mat a hi lai in a nungzui khenkhat in a ki lepsan ua mâleh numeite'n azui zing ui ti mu ahi. Chun kross ah khetdên ahi lai inle numei mi bangzât hem in azui zing ua, a ni thum ni zingkâl a thân ah va chia a Jesu thawkîr lam va he masa chu numei ma ahi.

(ii) *Numeite khenkhat leh sal-*

wchak Paul: Sawlchâk Paul lekthawt in a chibai bûkna in Juda leh Jentel numeite min a chuam tam mama ziang hi. Priska (hinna pengam), Junia (suangkul tâng), Julia, Nirea suapinu (Romte 16: 3,7,15) haw hin a pawsal/a sua-pipa tawh sawlchak Paul missionary nasêm zûi in a vâk kual uh hi.

Kristian kochuam pawl a din lim lai in kikhawp na

ding inn a um ziang pua. Krista gingtute chu Temple leh synagogue ah ala ki khawp thei tâklo ziak un mi inn sung in ala ki khawm sek uh hi. Zia hun a chun numeite mawpuakna ala lian ma ma mai hi. Apphia (Philemon 2) leh Priska (1 Korinth 16:19) te Inn hi ki-khawpna ah ala ki mang sek dân sawlchâk Paul in ala gen hi.

(iii). Numei kochuamte nasemtu (deacon/minister): Phoibi (Rom 16:1) leh numei pauchap leh thugen (prophesy 1 Kor 11:5) ti le ala um hi. Meithai Pathian nasemtu – chate vâk lian, zin leh lêng bawldân thiam, mithiangthote, liangvaite sawmdawltu (1 Tim 5:10) tampi le tâklat in a um hi. Numeite mûsitna leh tawniam khang ahi lai in Pathian nasep na in numeite le deacon ala um ta ahi.

2.2. Missionary hunlai:

Modern missionary kipat hun lai (18, 19 century) apat in numeite'n nasa tak in pan ala la uh ahi. India ah missionary Wil-

liam Carey a hung zaw nung sawt lo in numei leh pawsal tam-tak in missionary nasep in ahung pung to zel ta ahi. Ahîn lah missionary numeite hi tampi chal lang tak in lekhabu ah zik hi ala vâng mama hi. Missionaryte hi a zi teu in ahung zui le tampi ala um mâleh a pawsal teu chanchin bep in het in ala um hi.

(i). Kochuam din na ding ah numeite nasepna: Kochuamte – Baptist, Congregationalists, Penticostal, presbyterian leh Charismatics, lak in numei Pathian thugen ala tam mama ziang a. Kochuam piting leh Biakinn sak na ding a hin numeitên le pan ala la uhi.

(ii). Missionary Phuttu: England gam ah nu pakhat Beeby Wallis of Kettering kitinu inn a hin tangval hun khawp in pauchapna ala nei sek ua. Zia pauchapna ga pakhat chu ahi leh “Baptist Missionary Society of Great Britian” phudaw ahi. Zia societyte panpi na leh taw-sawtna a hin William Carey le missionary in ahung kalsuang ahi. Zia missionary hung kuan na ding ahin

Nu Wallis in mawpuakna thupitak ala nei hi. William Carey leh alawipa Dr. John Thomas ngei le a zi teu in achia na lam lam un ala zui ua, azîte'n a pawsal teu nasepna ala kithuapi zing uh ahi.

(iii). Nu-te pauchapna leh thawlawm: Nu-te pauchap khawmna leh thawlawm te ahin missionary te chawp in ala um uh hi. Kum 21 pha, chia theilo numei pakhat Mary Web kiti nu leh a lawite chu pauchapnate ala nei khawm zel ua, chun missionary te chawpna ding in sum ala khawl khawm sek uh ahi. Hun chawmkhat zaw in amau pawl hi Boston Female Society for Missionary Purpose ala kituu ahi. Amau hin le William Carey chu nasa tak mai in ala ki thuapi uh hi.

(iv). Missionary Society phut tu: Ann Baker Graves malatna in 1888 kum in Woman's Missionary Union phudaw in ala um hi. Baltimore mi Ann Jane Baker hin chapa medical doctor ala nei a, a chapa hi China in Mission-

ary in ala kalsuang hi. Anu Ann Jane hin achapa sepna chanchin haw chu US gam leh mun dang dang ah um te het ding in lekhazik in ala puang zâk sek hi. Zia gual a numeite nasepna a hin mi nâutâng te lungthim in missionary khaw hetna hi a belap sak ma ma hi.

(v). Missionary te sum a pan-pitu: Numeite hi sum leh pai in missionaryte pan-pitu sang pen in ala pang uh ahi (largest supporter). Gampâm ah missionary sawl daw na ding ah sum leh pai khawlkhawm in 1888 kum in numei missionary pathum hial China in ala sawl daw in ala chawm zo uh ahi. Zia thawlawm chu Lottie Moon Christmass offering for Foreign Missions ti in het ahi zing hi. Home mission (mani gamsung ah missionary) a ding in 1895 kum in thawlawm masapen chu ala bawl pan kit uh ahi. Zia chu Annie Armstrong Offering for Home Missions ti in het ahi kit hi. Tuni hi numeite choh thawlawm hitalo maleh numeite hi

panpitu sangpen (strongest supporter) in apang zawm zel uh ahi.

3. Missionary zi ginum tak tak te:

Kum 18 a chapang Ann Hasseltine Judson hi a pawsal Adoniram chu Burma in missionary sem ding in ala kalsuang ta ahi. Missionaryte zi hi na in zi te hi a maw puak nau thupi tak tak tampi ala um haw chu ala en hitiu.

(i). **Insung sutûp:** Numei te hi innsung nasep na ahin chawl tik umlo in sun leh zan in apang zel uh ahi. Asep thupi pen uchu inn-na suktup leh a sungkuan a pawsal leh achate taw-sawttu leh apawimaw hun in mapuitu in apang zel uh ngai ahi. Chun a pawsal in fel tak a na asepa theina dingin nu te hi a fel uh angai mama hi.

(ii). **Pawsal Nungthuap tu:** Nu te hi a pawsal teu a taw-sawt uh a ngai mama hi. Inn pawlam nasepna hi buai pi man lo khawp ahin inn sung na in abuai ma ma ziang sek uh ahi. Inn ah khaw-laileng, panpina hawl a um

chun kilawm tak a vaidawnding in pawsal bangzat um lele Nu te vaidawnding na khel umlo ahi.

(iii). **Pawsalte bei nung ah Nute maw puakna:** Pawsalte bei nung in le azi teu hin a pawsal nasep enkawl zawm le tampi a um hi. Dr. Iris (Tamil Nadu) kitinu hi le a pawsal bei nung in missionary na sem zawm zel in khawtang na le asem zel ahi.

Thukhâkna:

Zia article hi Pawsalte'n ahi lo leh Numeite'n Pathian nâ asepnau hi athupi zaw ding leh alian zaw ding lam khualna hilo ahi. Lekhabu a hin numeite Pathian nâ sepna chanchin hi mu ding vâng ma ma ziang ahi na ahin numeite'n le pawsalte gual in theitawp sua in Pathian nâ alasepnau I taklang nuam ahi. Chun, Kristian kochuam din ahi na hi kum 2000 aval ta. Numeite'n Pathian nâ asepnau aki mu te hi kochuam masawnzal na ding leh Chanchinpha puanzâk na in ala pawimaw mama ziang hi. Sêmtu ding a hin Pathian in numei leh pawsal dawî vek

ahi. Numei leh Pawsal sep thei
ki bang vek khel lo ma leh nu-
mei leh Numeite'n Pathian nâ
ala sepnau hi ngainêp theilo in
a lang hi. Mabân inle numeite'n
gingtu masate entawn zel in

Pathian nâ sêm ding in ginum tak
a pang to zel ding a Pathian min
in iki chial uh ahi.

--o0o--

TULAI KHRISTIAN TAM TAK TE DINMUN:

By- KL Muana Vaiphei

Khawvel pilna leh khawhei dan, gamtat dan, zulzau dan hi namenlo in a zalen ta, zia Thi-angzau khawvel ahi kiti mai leh a dik thei mai dia aw ka ti chang a um hi.

Thilpha, thutak hinkhua mat ah khawvel kitaitetna lam ah masawwna ding del sang in bail-am tak ah lawtinna leh a penpen hi ziang nawpna hin mihing a mapui ta hi in a kilang ta ti mai leng khiallo mai thei ahi.

Malai ah tawmngaina, thianthona, diktatna, nu leh pa zana, sang ah upa zawte zana, Pathian launa, kihepinate hi nasatak in a kiam ah, sawlchak Paul in, nang uh hi khawvel thuthang mai maite ziak in la bil uh sukn-gawng la hi tau "Kei Paul chu kidona pha chu ka zo tan, zawna Lallukhuk la ding ah chia di ka hitai" ati hi tawh I tulai khawvel chia dan hi lei leh van a kigamlat gual a bang tai.

Chun, nang uh le zia gual ma baw achun kitaitetna pha la zaw theina ding un haksatna gensenlo te zamsan in kumtuang

bukimna chu tung thei ding in kunglam chu del ham un ei ti ahi. Zia chu nang leh kei khut in a um ta ngei mai ah, a khawizawk chu tel di I hui em ei ma dawidan chiat in thupukna la mai tai tiu.

Zia khawvel lopina leh lalna te hi chung Vangam a I chan di tawh I tekak kham a hi him him puai. Khawvel nawpna leh lalna te hi khiak la kham ah ngailo te a ding in, Lalpa kiang lam zuan ham ham hi tiu. Zia chun khuaizu leh bawng nawi, sana dangka, ngunkhamtual lai a chun belum hawn tawh van Angel sim senlo te tawh lungkham beidawn um talo Lalpa ma hingtin zosia lengkhawm tai tiu. Zia lungkham-na ka na him a um ta puan, lim-tawp um talo di'n leng khawm dial dial di I hitai.

Zia mun leh hun chu mithi-angtho te chen nuam in a ngak la tau. Zia gam chu a hi ka kinepna chu Lala thuang ei pui tung mai tan. Ka khaulzin nau hi ka chim ta ma mau...piandang te tuallenna khawpi a chun ei hunlawp lut mai tan aw.

--o0o--

KISIKNA NI AHUNGTUN MA'N

- Haogouthang Vaiphei, Leilon

Thumapui:

Mihingte din hun pathum aum ah, achiasa, tuhun leh ahungtung ding aum hi. Taksa leh Thagau lam a Kisikna ni ahungtung ma'n, Ka chantawk ahin kalung akim puai, kipak nahim him kanei puai tia I genlo nading leh kisikna ni ahungtung ma'n I khangdawn lai hinkhua mang dingin anuai ah hin points pali ala en hitiu-

1. Nu/Pa chung a kisik ma la khangdawnlai hinkhua mangpha'n:

Nu ahiloleh Pa neilo le um maithei ta ihu, ahin Pathian in anei talo te Nu/Pa dinmun ah ding din midang eikawipiak le aum hii. Chun, Nu/Pa nei talo te a ding in Pa/Nu chu Pathian ahi bawk hii. Khawvel ah muthei dinga Pathian in ei kawipiak I Pathian chu Nu leh Pa ahi. I nu/pa bang chu, ahi na tawh kituak ah, Nu leh Pa pha, Nu leh Pa sia kanei hi tia za/zalo ding hilo in I Nu/Pa ahi ziaka za ding ahi (Kol. 3:20). Pathian in thu eipiak gual un, I Nu/Pa te thu zawp chu umdan diktak ahia chuleh malzawlina dinga thupiak masapen le ahi (Ephesa 6:1-2).

Chate hi Golul pen leh kinepna bulpi in I Nu/Pa ten einei

ui. Nu/Pa thu awi ding, za ding, chawhawi ding tihi I pian mangsang ah Pathian in alaguatsa chu khai..e! Khangthak nang leh kei in insung mi, Nu leh Pa daw gual ah ala umlo te a dingin tuhi hun lemchang hilo ahem? Banggual dinmun ah kahung ding diam ti gênthei ihilo ziak un kisikna ni ahungtung lo nading in hinkhua mang hitiu.

2. Thagau hinkhua kisik ma khangdawnlai hinkhua mangpha'n:

Thilsiam lak ah danglam diak Thagau nei eihaw mihingte ihu. Tulai khangthak ten taksa thil pawimaw isak gual un Thagau lam hi apawimaw diak hi. Thagau lam hinkhua bangchan katung/itung em ti ingaitua khau em? Ngaitua hun chu akul mama tai. Thagau lam hinkhua ding gel-

nan taksa thilte icha'n ding atam khawp mai ahi. Khangthak hun-sung ahin thagau lam hinkhua ah kisikna ni ahungtun man Pathian taw eima kikal hi siamtuak akul mama hi.

Pathian dawigual ah itak-sa thunun thei hi chu a pawimaw na ea...aw! I thil hi teu ziak ah mi bang zat in Pathian thilhithe na amu tau em? Gitlona thatzaw in umkin la, phatnan gitlona chu thazo zaw tan (Rom 12:21). Ginglotu lak ah midangten ama Pathian khu Pathian tak chu ahi'n biakta'k ahi ti khangdawng hun-sung ah hin suklat ding chu eimau mawpuakna ahi. Ahin taksa lam ah tupa chun taksalam ah siatna chu luak intin, Thagau lam ah tupa vang chun Thagau lam kumtuang hinna chu luak in a (Gal. 6:8).

3. Thiamzil nalam ah kisik ma lakhangdawnlai hinkhua mangpha'n:

Tulai khawvel khan-to dungzui in thiamzil nalam hi apawimaw tawh tuk in Sapte thupil chun "Education prepares us for tomorrow" tin ala gen hi. Thiamzilna pang zosia chun khawvel kitaitet na pang kahi ti hi geldaw apawimaw hi.

Khangthak khenkhat chu lekha zilnalam neilo ah thildang zil nei maithei ihu, ahin ahungtung ding ngaitua na zil/sem ihi vek ui. Sapte thupil chun "What you want to be in the future is depend upon how you prepare today" tin alagen hi.

Khangthak ten I thiam zil/nasep nalam un lawtinna idawi suak vek ui, lawtin na hi-chu kipak na ahi. Nangle kei ah ding ah losapna chu kalbi nei ah lungkelo hial ah panlak akul hii. Lawtin na inei nading in theit-awp sua'h panlak apawimaw ah, akhel lam chu Pathian pang ding ahi ti hetmil lo apawimaw hi "Do your best and let God do the rest!". I thiamna/bawlthei na hi mite ah ding tiang in malsawm na ahi nam? Ahilo chun nang leh kei ah dingin siatnan imang sek em? Khai e..! Themzil nalam ah le Pathian tawh pankhawm ah kisikna ni ahungtun man lawtin na chu hadel in del hitiu.

4. Pawsal/Zi nei kisik lo nadin lakhangdawnlai hinkhua mangpha'n:

Kichen hi Pathian in mih-ingte umdan dinga alaguat chu ahi. Mihing te apun thei nading in kichen hile Pathian lemguat ahi

bawk hi (Gen.1:28). Khangthak nang leh kei in Pathian ah hin-na nei mi kichenpi ding Pawsal/ Numei ihawl sek em? Khangthak khristian chun, a ji/pawsal ding chu thagaulam ah pitin nanei, ho kibatpi, Nu/Pa za mi, hepina nei telding ah lawm chu ahi. “Thil tampi I telkhel ahi chun, telphatkit thei ahia, damsung ah umpi ding latelkhel ahi chun, kisik ah telkitthei ahi pua, kisik lo nadingin Pathian dawngkawm ah thupukna siem akul hi”.

Khristian Kichen hin atup leh adawi chu hepina nei ah christian insung semding hi ahi. Mihem hinkhua ahin kipakna ding sanga kipak lo nading atam zawsek hii. Kihepi tua ah, kilainatna nei in, Pathian in Khrista ah ei ngaidam gual un hepina nei apawimaw hi (1 Korinth 13). I pawsal/zi ding chu phatnalam hihen, setnalam hitale hetchen masak ahi lo chun thil tampi asusethei hii. Khai e..! nang leh kei in Pawsal/zi neina dinga kisikna ni ahungtun man Pathian dawng kawm ah hinkhua mangding in iki chial ahi.

Thukhakna:

Khrista sepai khangthak ten lamsuk/lamto zawtzing ihi lai un, thuakhat taka pangte bep in zawna achang sek ui. Thugentu 12:1 na, Solomon in ala gen tak gual in khangthak nang leh kei hinkhua hi Pathian panglo ah umzia neilo, hinthaman umlo leh lulna bei ahi dan imuthei ahi. I pu sawlchak Paul in “kei a dingin hin chu Khrista nasepna ding a hia, thi chu keima a dingin lawkna a hi (Philippi 1:21)” ala ti tawp hi. Khai e..! tuni hin Khangthak nang le kei in Pathian hatna suang in Nu leh Pa chung, Thagau hinkhua, Thiamzil nalam chuleh I Pawsal/zi neina ding ah, kisikna ni ahungtun man, Pathian chate ihi nau sulang zing thei ah hinkhua mangding in Pathian min in iki chial ui.

HIAT DINGA PHA (Based on the Bible BSI publication)

~by Tv. Daniel, Tangmual

THUTHUNGLUI (OLD TESTEMENT) SUNGA WORDS TAMPEN TE:

S/No.	Lekhabu	Bung leh Chang	Words zat
1	Genesis	19:9	242 words
2	Exodus	26:19	288
3	Leviticus	5:15	262
4	Numbers	5:15	270
5	Deuteronomy	5:14	250
6	Joshua	8:33	299
7	Judges	6:13	255
8	Ruth	4:4	301
9	1 Samuel	10:27	436
10	2 Samuel	9:10	280
11	1 Kings	12:16	269
12	2 Kings	16:15	380
13	1 Chronicles	29:2	350
14	2 Chronicles	25:16	310
15	Ezra	8:35	286
16	Nehemiah	5:5	280
17	Esther	4:11	291
18	Job	1:5	269
19	Psalms	17:14	219
20	Proverbs	30:9	143
21	Ecclesiastes	9:11	281
22	Song of Songs	4:8	186

23	Isaiah	45:14	338
24	Jeremiah	35:15	328
25	Lamentations	1:21	176
26	Ezekiel	46:12	297
27	Daniel	6:12	317
28	Hosea	11:8	209
29	Joel	2:20	201
30	Amos	7:17	237
31	Obadiah	Chang 18	149
32	Jonah	1:3	206
33	Micah	3:11	232
34	Nahum	2:13	240
35	Habakuk	1:8	202
36	Zephaniah	2:9	209
37	Haggai	1:14	200
38	Zechariah	8:19	248
39	Malachi	3:5	241
<i>1 Samuel 10:27 na hi words tampen a hi.</i>			

--o0o--

Dik la sa em?

By:- Rev. N. Dalla

1. A phatlona mi'n a melkhu khu ziangte hin, ki siamphat na châng a hethei puau ah, ki suasal ek ek ziangte haw hinle, thilpha a zui thei ngai diak puau.
2. Mi ama leh ama ki thununzo te khêl ah mihât ding a um puau a, ama leh ama nasan ki thunun zolo te khêl ah mi hâtmaw dingle kuama um kîtlo ahiu.
3. Mi nuainung te hi mi hâtlote ahi ziang puau ah, mi chung ah kilap sâng zosia hile mihât ahi him him lo uh ahi.
4. Lekha thiam zosia hi mipil ahi ziang puau a, mipilte chu lekha a thiam deu tei kît ua, pilna ding ah lekha simte sâng in, a lekha thiamna pilna ah mangcha theite chu mipil ahiu.
5. Sam ziktu chun "Thagum ah mi lâkpiak hi kimuanpi kin la, misuam hile kisuanni diak kin.." atia (Sam 62:10) tulai mi tamtak in thagum hât ah thil bawlthei chu kisuanna in i ngai tau ahi.
6. Diktatlona tawh thagum hât ah hung lawting te sâng in, diktatna leh thunuai gawlna ziak ah hung lawsam khate chun, lawtinna diktak a hung mu zawsek uh ahi.
7. Mipi a tamzawn bawl leule a phalo chu a pha diak pua, a bawl nuam kuama umlo leu le apha chu apha ahi zing ziang ahi.
8. Buaipilo ding khat hi i buaipei ahileh, buaipei ding khat hi ala ki buaipei khasek pua, buaina ding dawl ah i buailo ahileh, buailona ding khat ah ki buai nuam ahi.
9. Uicha leh mengcha vaithum akichu chu'u leh zawng achang hi, ti thusim gualin, tuchung election result i etleh mun khenkhat in a gitung ahi.
10. Gam leh nam puitu ding ah têldaw ah umte hi, a kineisak chuam bîk i hung um zêl ua leh vâng, i gam i nam in ki dampi lo hial ding ahi.
11. Dawi in dawilo leu hinle sawlkar ngai ngai in ei pawkît ding ahi-ta, têkse te'n "a salâi i sawk lo leh aki hepulai" atiu kha i tun phawt uh ngai didan ahi.

12. Thadou laphuaktu khat in “Ka lung heina ding uh ahi pou leh suh-gimna jong kasang ui Pakai” ala ti kha atak tak ah i tuak phawtlo leh khanglo theilo ding i tam ma ma’u ahi.
13. MLA hung kaidaw hi lawtinna ahi zinglai in, lawsapna huang sung ah valut patna le hung hithei ahi ziakin, mipil leh mingawl hung ki hiat theina bul le hi ngal ahi.
14. Sum bep en ah mit hakte ding achun, MLA hi sum nâk gual ah gêlthei ahia, a hinla, gam sung siampha nuamte ding achun vâng, mite mu’thei ah napha sep kipatna bul le hi ahi.
15. Noah suante khan Babel insang asau ah, khangto ah a kingai lai un, gamtin ah ahung ki thedal khawlaw ua, khat leh khat khat kiho theilona bul le ahung hita ahi.
16. I pu i pateu khan khantona ala hekha nai puau ah, a hi’nla, ala kiho thei ua, tulai chu khangto i ki sa ma ma tau ah, himaleh, i khantonau hi kiho theilona’n i mang gam tau ahi.
17. Têksete’n “Lal ngailo lal a nâi..” ala tiu hi, thuneina neukhat a vak nei leh ki bawl thei sak ma ma ziang, mi’ bangma mulo pai ziang, ti haw hi ala hisek didân uh ei vei maw..?!
18. Têksete’n “In gua huailo gam gua huai” ala tisek uh hile, tulai ah hause tam takin a khawchaga te sâng ah sum leh pai a ngaikhawk zawk hawu hile a gênnau hithei tho ding ei vei maw..?!
19. Têksete’n “Ui tui khulo a sa zawi..” ala tisek uhi i ngaitua i ngaitua ahileh, tulai ah mipha ma ma ding ah i ginchâk, a kamsung a nê m a nê m, a lungthim a siat ah sia kiti haw hile hithei tho ding ei vei maw..?!
20. Têksete’n “Gûl chuk loin gûl gû a he puai..” ala tisek ukha, tulai i gam politics chiadan uhi i etleh gûl gû i hung hiatna diu hi gamla talo maithei ei vei maw..?

--o0o--

Presbytery sung thu chuam chuam – August 2022

1. Khuga Sadar Presbytery huap sunga District tin a 3vei channa NSSU Khawmpi chu 25th-26th June 2022 sungin nei zaw vek ahi. Zia hunsung ahin, competition item chuamchuam(indore+outdoor), Bible recitation, solo leh adangdang te nei in nuamtak leh lawktak ah matzaw ahi.
-Tuithanak District - Lingsiphai P.C
Topic- “Thununna ngaina mi chu hiatna ngaina ahi’n, zilgaina zada mi chu mi kanang ahi” Prov. 12:1
-Town District - Gangpimuol P.C
Topic- “Lalpa ah chun la nu-lapate’u thu zawm un” Eph. 6:1
-Khuga District - S. Kawtlian P.C
Topic- “Lalpa lau hi pilna bul ahi” Prov.1:7
-Sadar District - L. Champhai P.C
Topic- “Lam dik ah naupangte puihuai ding” Prov.22:6.
2. Manipur Synod in Unit visit bawl zawm zel in Dt. 10/7/2022 nin ei Presbytery sunga Tuithanak Dist. ah Tangmual P.C leh Town Dist. ah Nghathal P.C. ahung ve ui.
3. Dt. 28th June 2022 ni’n Manipur Presbyterian Church Synod nuai ah Ministers, Pastors & Pro. Pastors consultation chu Synod Session Hall, I.B Road ah nei a hi.
4. Dt. 21st July 2022 ni’n Khuga Dist. PWF in Tispari M/F vena va nei in, Pathian thu leh la kipawlkhawmna hun chawmkhat amang ui. Puitu- Nu Chingboi Chairperson leh Nu Ngailian Secretary, Speaker- Rev. Pauneithang, Khuga Dist. Bialtu, Semtute introduction- Evan. Pautinlam in anei hi. Khuga PWF in mission field a dinggin BELPI khat pia’n, thingpi dawnkhawmna a nei ui.
5. Dt. 22nd July 2022 ni’n Tangmual Jubilee Veng ah CKKP (KSP) in IGP In asak uh chu Rev. Thanglianmang, Moderator KSP in hawmna leh latna a nei hi. Zia Prog. hi PWF(KSP) le a uap ban un, Khanglai-Nu leh Pa te chiakhawm in In hawmna Prog. mat ahi. In hi room pani ahin, a lua man dingin ₹. 2,500/- per month lak hi ding a hi.

'DAMNA AW' PHUNGVUKTUTE :

PATRON MEMBERS :

- | | |
|-----------------------|-------------------------------|
| 1. Pu P. Vaiphei IAS, | Imphal |
| 2. Upa Henthianthang, | S.Kotlian |
| 3. T.Upa Haulallawm | S.Kotlian |
| 4. Upa Thienkhomang | S. Kotlian |
| 5. Upa Laltinkhup, | HQ. Church, Tuibuang |
| 6. Pi Manliankim, | HQ. Church, Tuibuang |
| 7. Upa D. Mina, | Lingsiphai |
| 8. T.Upa Ph. Gena, | Lingsiphai |
| 9. Pu. Khamlal | Saipum |
| 10. Pu Khamliankap | Saipum |
| 11. Pu. Tinlunlal | Saipum |
| 12, Pu. S.Kapbawi | New Delhi |
| 13. Upa Genhau | Central Church, Compound veng |
| 14. Pu. Khailianbawi | Central Church, Compound veng |
| 15. Pi Kimtawi | Kohima |
| 16. Tv. Daniel | Tangmual |

MEMORIAL GIFT :

- | | |
|--------------------------------|--|
| 1. Pi Deem Melody, | Central Church, (Rengkai)
<i>[In loving memory of (L) Upa Lamthianlal]</i> |
| 2. Pi Rebekah | Kangvai
<i>[In loving memory of (L) Pastor Khaivung]</i> |
| 3. Upa Liansawmthang | Lingsiphai
<i>[In loving memory of (L) Pu. Henzagen]</i> |
| 4. Pi. Nem Grace Boisi Capvung | Delhi
<i>[In loving memory of (L) Pi Vanlalchhuangi]</i> |

SUPPORTING MEMBERS :

- | | |
|---------------------------|-----------------|
| 1. Upa Khomlunlal | S.Kotlian, |
| 2. Pu. S.Thangminlian | Lingsiphai, |
| 3. Pu Lelboi, | Lingsiphai |
| 4. T.Upa Lalneilian | Central Church, |
| 5. Pu EL Soson | Central Church |
| 6. T.Upa Genminthang, | Central Church, |
| 7. Pi. Kimneihawi | Saipum |
| 8. T.Upa J. Mark | Saipum |
| 9. Pu Genthiankap, | Nghathal |
| 10. Pu Lianzakhup | Nghathal. |
| 11. Pu Lemthang | L. Mission Veng |
| 12. Rev. S.T.Kaia Vaiphei | Nghathal |
| 13. Nk. Dimkhoniang | Zikpi Tampak |

ENCOURAGING MEMBERS :

- | | |
|-------------------|-----------------|
| 1. Pu K. Minlian | Tangmual, |
| 2. Upa Ph. Kamlam | L. Champhai, |
| 3. Upa S.T.Siam, | L. Mission Veng |
| 4. Pi Chhungi | Hq. Tuibuang |
| 5. Pu S. Paumuan | Saipum |
| 6. Upa Tongneilal | Leilon |

Damna Aw monthly magazine hi tutiang ahin kochuamte'n phungvukna i bawlte'u ziaka hin chiazal i hiu a, kuale phungvukna bawl utte a ding in bangtik lai in le bawlthei zing ahi.

(i). Patron member- Kum 3 (three) a ding in. ₹. 3,000/-

(ii). Memorial Gift- Kum 2(two) a ding in. ₹. 2,500/-

(iii). Supporting member- Kum2(two) a ding in ₹. 2,000/-

(iv). Encourager- Kum 1(one) a ding in. ₹. 1,000/-

Chun, sum thawt nuamte a ding in:

A/C name: Khuga Sadar Presbytery(MPCS)

A/C nos: 32483318505

Branch code: 6182, CCpur

CIF nos: 86412486695

IFSC nos: SBINOOO6182.

--o0o--